

Fraccion MEP

Ayera 26 aña pasa Gabinete Oduber y Coastal a firma un contrato pa reapertura di e refineria

ORANJESTAD - Ayera 19 di october ta un dia memorabel ya cu riba un dia manera awe 26 aña pasa nos ex Prome Minister Sr. Nelson Oduber den nomber di gobierno a firma un contrato hunto cu Sr. Oscar Wyatt di Coastal Corporation pa asina haci posibel e reapertura di e refineria na San Nicolas y cu un inversion di mas cu 250 miyon dollar.

Y esaki a sosode den apenas 8 luna despues cu e gobierno di MEP/PPA/ADN a sinta na februari 1989. Remarcabel ta cu e tempo ey Sr. Nelson Oduber no a biahha rond mundo, manera Venezuela, Colombia, Mexico, Brazil, Merca, China y pa wak si nan ta interesa den opera e refineria. Solamente un 'letter of intent' a wordo firma cu Coastal dia 23 di juni 1989 y finalmente e firmamento di e contracto cu duracion di 20 aña riba dia 19 di october 1989.

E tempo ey den reunion di Parlamento Sr. Henny Eman a declara cu si Sr. Nelson Oduber logra habri e refineria, e ta un heroe. Esaki a bira realidad ora cu Sr. Oduber a logra habri e refineria dia 20 di april 1991 y esaki a keda den operacion durante 21 aña, te cu esaki a cera na November 2012, esta bao di Gabinete Mike Eman.

Hecho ta cu Coastal no solamente a tuma e refineria, pero a bay over na inverti sumanan grandi pa expande e refineria, entre otro cu Delay Coker. MEP di e forma aki a cumpli cu e

deseo di pueblo y e promesa di Betico Croes, esta cu si tin 1% di posibilidad pa habri e refineria, cu mester explora esaki profundamente.

Ta p'esey laga e dia di awe ta

un dia di reflexion, caminda tur intento lo keda wordo haci pa habri e refineria atrobe y cu esaki siguramente lo ta na beneficio di Aruba en general y e pueblo di San Nicolas en particular. □

